



Schweizerische Eidgenossenschaft
Confédération suisse
Confederazione Svizzera
Confederaziun svizra

**Instanza da recurs independenta
da radio e televisiun**

Rapport annual 2011 da l'Instanza da recurs independenta da radio e televisiun





Schweizerische Eidgenossenschaft
Confédération suisse
Confederazione Svizzera
Confederaziun svizra

**Instanza da recurs independenta
da radio e televisiun**

Rapport annual 2011 da l'Instanza da recurs independenta da radio e televisiun

Schlargià la libertad da las medias

L'onn 2011 è stà in onn d'elecziuns. Avant tschernas èn las medias electronicas oblidadas dad esser spezialmain precautas per betg preferir u dischavantagiar ina partida sin donn e cust da l'autra. Sco adina han ils posts da mediaziun gì da tractar insaquants recurs en connex cun las elecziuns federalas, ed en in cas è in recurs vegni tar l'Instanza da recurs independenta da radio e televisiun (Instanza). Quai è stà in recurs cunter l'access refusà al program che l'Instanza n'ha betg acceptà, perquai che la decisiun da l'emettur è stada plausibla e suandabla. La partida accusanta n'è numnadaman betg vegnida discriminada evidentamain.

Remartgabel è dentant che la libertad da las medias è daventada pli gronda l'onn 2011 en connex cun las elecziuns. Igl ha numnadaman dà adina dapli emissiuns politicas sin chanals privats – sco per exempl „Filippos Politarena“ sin Sat.1 (Svizra) u „Teleblocher“ en la „Televisiun da Schaffusa“ – ch'eran colliadas cun tscherts politichers u candidats per il parlament u che han preschentà – sco „Polimag“ sin „Star TV“ – candidats tenor libra tscherna. L'Uffizi federal da communicaziun ha intercurì la dumonda, schebain „Filippos Politarena“ u „Teleblocher“ untrafetschian al scumond da far reclama politica. Ins è dentant vegni ad ina conclusiun negativa, perquai ch'ils acturs principals n'hau betg pajà per l'emissiun. Uschia èn sin il pli anc stads pussaivels recurs tar l'Instanza. Ma nagins n'en vegnids inoltrads. Nua ch'i na dat betg in accusader, na basegni er betg in derschader. E quai vul dir ch'il public ha tolerà cleramain avant las elecziuns dapli unilateralitat en ils rapports da las medias. Cler è che las emissiuns supplementaras han dà a singuls candidats e partidas bler dapli paisa che ad auters. Quai ha schlarginà la libertad da las medias.

Da remartgar è er ch'il Tribunal federal ha refusà insaquantas decisiuns da l'Instanza, interpretond il princip d'objectivitat in pau pli generusamain che la preinstanza. El ha argumentà en quel senn ch'er renfatschas inexactas sajan permessas en ina contribuziun. L'impurtant saja ch'ils pertutgads vegnian a pled e possian contestar las renfatschas. Il Tribunal federal è stà da l'opiniun che gist emetturs privats na stoppien betg far tant stim da l'equiliber sco la SSR. Decisiv saja ch'il public sappia da tge ch'i sa tractia e ch'el possia sez valitar las personas mussadas. Er quai ha schlarginà la libertad da las medias.

Da l'autra vart ha il Tribunal federal rinforzà ils dretgs dal public, cur ch'el ha ordinà a l'Instanza d'applitar il recurs pervia da l'access refusà al program betg mo per in'emissiun concreta, mabain sur ina perioda da plirs onns – sco en il cas da la protecziun dals animals – e da sclerir generusamain, schebain in tema u in'organisaziun na saja betg vegnida discriminada evidentamain. L'Instanza è vegnida a la conclusiun che quai na saja betg stà il cas. Ma quai ch'il Tribunal federal ha decidì dat al public pussaivladads supplementaras da controllar il program.

A la fin da l'onn è Denis Masmejan sa retratg da l'Instanza suenter avair appartegni 15 onns a quella. Cun el perda l'Instanza in commember ordvart talentà ed engaschà. El aveva las premissas idealas ch'i dovrà en l'Instanza: enconuschiantschas da las medias sco schurnaliste activ ed enconuschiantschas dal dretg sco giurist promovi. Ed el è stà in commember zunt alert ch'è adina puspè intervegnì spontanamain cun ferms arguments sin aut nivel. Jau al engraziel er en quest lieu per sia zunt appreziada collauraziun. Mes engraziamenti sa drizza er als auters commembers da l'Instanza che han ademplì l'onn passà lur duair cun gronda disciplina, ma er als commembers dal secretariat che han gî da correspunder a pli grondas pretensiuns pervia da novas incaricas. Mes engraziamenti sa drizza er als commembers dals posts da mediaziun che han puspè prestà buna laver cun preselecziunar, valitar ed intermediar ils cas e che han uschia distgargià considerablamain l'Instanza.

Roger Blum, president da l'Instanza

Cuntegn

1 Basas legalas	5
2 Cumposiziun da l'Instanza	6
3 Gestiun	7
4 Posts da mediaziun dals emetturs da radio e televisiun	8
4.1 Survista	8
4.2 Reelecziun dals posts da mediaziun	8
4.3 Barat tranter l'Instanza ed ils posts da mediaziun	8
5 Procedura da recurs	9
5.1 Gestiun	9
5.2. Emissiuns crititgadas	9
5.3. Recurs approvads	10
5.4. Dumondas da procedura	10
5.5. Dumondas da cumpetenza	11
5.6. Dretg material	12
5.7. Proceder suenter violaziuns constatadas	13
6 Or da la pratica da l'Instanza	14
6.1. Decisiun b. 623 dals 3 da decembre 2010 concernent la Télévision Suisse Romande, emissiun „19:30“, contribuziun davart las „VgT-Nachrichten“	14
6.2. Decisiun b. 593/607 dals 22 d'octobre 2010, concernent la Televisiun svizra, rapports manchentads davart il VgT	15
6.3. Decisiun b. 616 dals 3 da decembre 2010, concernent la Tele Züri, emissiun „ZüriNews“, contribuziuns davart Carl Hirschmann	16
6.4. Decisiun b. 629 dals 17 da zercladur 2011, concernent la Televisiun svizra, emissiun da tard da la „Tagesschau“, contribuziuns davart il conflict da pajas en la branscha da construcziun	17
7 Tribunal federal	19
7.1. Sentenzia 2C_664/2010 dals 6 d'avrigl 2011	19
7.2. Sentenzia 2C_710/2010 dals 18 da november 2011	19
8 Fatgs internaziunals	21
9 http://www.ubi.admin.ch	22
Agiunta I: Cumposiziun da l'Instanza da recurs e secretariat	24
Agiunta II: Indicaziuns statisticas per l'interval da 1984 - 2011	25

1 Basas legalas

L'activitad da l'Instanza da recurs independenta da radio e televisiun (da qua davent: Instanza) sa basa sin l'art. 93 al. 5 da la Constituziun federala (da qua davent Cst.; CS 101). Tenor questa disposiziun pon recurs cunter il program vegnir suttamess ad ina instanza da recurs independenta. Las disposiziuns executivas sa chattan en la Lescha da radio e televisiun (LRTV; CS 784.40), en l'Ordinaziun davart radio e televisiun (ORTV; CS 784.401) ed en il Reglament da fatschenta da l'Instanza approvà dal Cussegl federal (CS 784.409).

L'onn da gestiun han cumenzà – sut l'egida da l'Uffizi federal da communicaziun (UFCOM) – las emprimas lavurs per reveder parzialmain la LRTV. En quest connex èn er planisadas midadas relevantas pertutgant l'Instanza. La surveglianza davart il cuntegn da l'ulteriura purschida publicistica da la SSR – latiers tutgan er la purschida online ed il teletext – duai vegnir transferida da l'UFCOM a l'Instanza (guarda er cifra 5.5 qua sutwart). En in'emprima consultaziun ha l'Instanza beneventà questa midada. La surveglianza dal cuntegn da las medias duess succeder da princip tras autoritads independentas da l'administratzion. L'Instanza è plinavant s'exprimida per realisar la procedura da surveglianza tant sco pussaivel analogamain als programs da radio e televisiun. En il rom da questa revisiun parziale da la LRTV duain er vegnir abolidas las cumpetenzas da l'Instanza da relaschar resp. smanatschar sancziuns administrativas (art. 90 LRTV) che n'en praticamain betg stadas relevantas fin ussa. Quellas na correspundian numnadamaain betg a la Convenziun europeica dals dretgs umans (CEDU; CS 0.101).

A partir dal 1. da schaner 2012 vegnan las tschintg unitads ch'en suttamessas administrativamain al Departament federal per ambient, traffic, energia e communicaziun (DATEC) – e latiers tutga er l'Instanza – ad avair in quint independent. Ellas survegnan agens credits per il persunal e per las expensas. Questa midada – che punctuescha anc dapli l'independenza da questas autoritads – pretenda dentant ina midada da l'art. 6 al. 1 dal Reglament da fatschenta da l'Instanza. Il nov text dals 2 da december, ch'il Cussegl federal ha approvà ils 9 da december e che va en vigur il 1. da schaner 2012, sa cloma: „L'Instanza fa ses preventiv e suttametta quel al Secretariat general dal Departament federal per ambient, traffic, energia e communicaziun.“ Empè da „Finanzas e contabilitat“ è il titel da l'artitgel correspondent „Preventiv e contabilitat“.

2 Cumposiziun da l'Instanza

En connex cun las elecziuns da renovaziun da l'Instanza ha il Cussegli federal confirmà prof. Roger Blum per quatter ulteriurs onns – 2012 fin 2015 – sco president da l'Instanza. Er set dals otg ulteriurs commembres da fin ussa èn vegnids reelegids per l'entira perioda d'uffizi u – uschenavant che lur temp maximal da 12 onns en uffizi scada gia pli baud – vegnids confermads per ina part da la perioda d'uffizi: Regula Bähler, vicepresidenta (fin la fin dal 2012), Paolo Caratti (fin la fin dal 2015) Carine Egger Scholl (fin la fin dal 2015), Heiner Käppeli (fin la fin d'avrigl 2014), Alice Reichmuth Pfammatter (fin la fin dal 2013), Claudia Schoch Zeller (fin la fin dal 2015) e Mariangela Wallimann-Bornatico (fin la fin dal 2015). Per Denis Masmejan, che n'è pervia da la limitaziun dal temp d'uffizi betg pli stà reelegibel suenter 15 onns da fritgaivla activitad, ha il Cussegli federal elegì prof. Stéphane Werly sco nov com-member da l'Instanza. El docescha dretg da medias e dretg public a las universitads da Neuchâtel e Genevra. Stéphane Werly è er co-editur da la revista „medialex“.

3 Gestiu

Ils 24 da favrer è la scheffa dal DATEC, cussegliera federala Doris Leuthard, s'inscuntrada cun il president da l'Instanza, Roger Blum. A chaschun da quest barat d'opniuns èn las proximas elecziuns da l'Instanza e la revisiun parziala da la LRTV stadas en il center. Roger Blum ha declarà a la scheffa dal Departament la necessitat da la revisiun ord vista da l'Instanza. Ultra dal fatg che la cumpetenza pertutgant la surveglianza da l'ulteriura purschida publicistica tar la SSR n'è da preschent betg cuntentaivla, ha el er rendi attent a la situaziun che persunas da l'exterior n'hajan nagin dretg da far recurs (art. 94 al. 1 LRTV) e che la soluziun concernent la regulaziun dals custs da proceduras da recurs tar il Tribunal federal na saja betg cuntentaivla. Il president da l'Instanza ha plinavant punctuà la pussaivladad dal DATEC da recurrer tar l'Instanza senza esser pertutgà d'ina emissiun e senza stuair recurrer l'emprim tar il post da mediaziun. En cas da cuntravenziuns evidentas cunter ils princips dal cuntegn da la LRTV u per giuditgar dumondas generalas dal dretg da program haja il Departament questa pussaivladad. L'Instanza percuter po daventar activa formalmain pir sin in recurs e betg d'uffizi.

Ultra d'accumpagnar professiunalmain ed administrativamain las activitads da l'Instanza è il secretariat stà occupà cun insaquants projects spezials. En connex cun la reorganisaziun administrativa (guarda cifra 1) ha el elavurà cun il Secretariat general DATEC ina cunvegna per „Segirar il sustegn administrativ e logistic da l'Instanza tras il Secretariat general DATEC“. L'introducziun da la gestiun electronica da las fatschentas (GEVER) e da la correspundenza electronica en proceduras da recurs, quai ch'è previs per l'onn 2012, la consegna d'actas davart proceduras da recurs a l'Archiv federal sco er la repassada da la pagina d'internet (guarda cifra 9 qua su-tvart) han marcà l'ulteriura activitad dal secretariat da l'Instanza. Tar il secretariat n'hai dà l'onn passà naginas midadas da personal.

4 Posts da mediaziun dals emetturs da radio e televisiun

4.1 Survista

L'Instanza è cumpetenta per eleger e per survegiliar ils posts subordinads dals emetturs da radio e televisiun, cun excepciuon da quels da la SRG SSR (art. 91 LRTV). Las trais regiuns linguisticas disponan mintgamai d'in agen post da mediaziun. Ils posts da mediaziun, ch'en affiliads administrativamain a l'Instanza, l'han da preschentiar onn per onn in rapport.

4.2 Reelecziun dals posts da mediaziun

Ils commembers dals posts da mediaziun, subordinads a l'Instanza, èn vegnids re-elegids per quatter ulteriurs onns. Per las regiuns tudestgas e rumantschas è quai dr. Guglielmo Bruni, per la part franzosa Denis Sulliger e per ils italofons Gianpiero Raveglia. Sco lur substituts èn vegnids confermads Oliver Sidler, Gianpiero Raveglia e Guglielmo Bruni. La perioda d'uffizi dals commembers dals posts da mediaziun è vegnida adattada a quella da l'Instanza (2012 fin 2015).

4.3 Barat tranter l'Instanza ed ils posts da mediaziun

Ultra da numerus contacts informals ha er puspè gî lieu l'onn 2011 in inscunter tranter ils commembers dals posts da mediaziun e l'Instanza. Tar questa occurrenza è l'infurmaziun tras radio e televisiun avant las elecziuns federalas stada en il center. Tar ils pli blers posts da mediaziun hai dà recurs che pertutgavan tant emissiuns realisadas sco er l'access refusà ad emissiuns d'elecziuns. Per regla sa tractavi dal dischavantatg pussaivel per partidas u per candidats. L'Instanza ha ludà las fadias extraordinarias dals posts da mediaziun che liquideschan spert e gist spezialmain recurs urgents davart l'access refusà als programs da singuls emetturs da radio e televisiun. Sin basa da l'activitat dals posts da mediaziun han ins pudì liquidar plirs recurs a la buna.

In tema dal barat è er stà il fatg che la designaziun dals posts da mediaziun cumpe-tents manca per part sin la pagina d'internet dals emetturs da radio e televisiun. Ils posts da mediaziun e l'Instanza han rendi attent ils emetturs a questa mancanza.

5. Procedura da recurs

5.1 Gestiun

Durant l'onn da gestiun èn vegnids inoltrads 18 novs recurs (onn avant: 14). Tranter quels sa chattavan 12 recurs populars tenor l'art. 94 al. 2 e 3 LRTV, nua ch'ils recurrents èn anc vegnids sustegnids d'almain 20 persunas che fissan er stadas legitimadas da far recurs (onn avant: 9). 6 recurs èn stads recurs individuals resp. recurs da pertutgads tenor l'art. 94 al. 1 LRTV. Là han ils recurrents ina stretga relaziun cun il cuntegn dad ina u da pliras emissiuns (onn avant: 5).

Tar ils posts da mediaziun, che vegnan en aczjun avant l'Instanza, èn vegnidas inoltradas en tut 222 reclamaziuns l'onn 2011 (onn avant: 170). A l'Instanza èn vegnids tratgs vinavant sulettamain 8.1 % dals cas (onn avant: 8.2 %). Quai suttastritga la funcziun impurtanta ch'ils posts da mediaziun han en la procedura per la surveglianza dal dretg da program.

L'Instanza ha liquidà l'onn 2011 en tut 23 recurs (onn avant: 13). Da quels èn 19 vegnids giuditgads tenor il dretg material (onn precedent: 11). Sin trais recurs n'hant ins betg pudi entrar (onn avant: 2). In recurs è vegni retratg suenter ch'il recurrent ha pudi s'accordar cun l'emettur pertutgà.

L'onn da gestiun ha l'Instanza gì sis sesidas. Ina da quellas ha durà dus dis. Cun in'excepziun han ins deliberà publicamain ils recurs materials. La sesida tradiziunala da dus dis è stada la fin d'avust a Liestal ed a Basilea. Sper la deliberaziun publica, che ha gì lieu en la Chasa da la Regenza da Basilea-Champagna, ha l'Instanza organisà ina conferenza da medias a Basilea. Ultra d'ina preschentaziun da l'Instanza e dals posts da mediaziun èn ils princips dal dretg da diffusun avant elecziuns stads en il center. Guglielmo Bruni, dal post da mediaziun da l'emettur regiunal, ha er prendì part da la conferenza da medias ed orientà davart sia activitat. Ils commembers da l'Instanza han er visità il program da radio DRS2 ed il Schurnal regiunal en il studio da la SSR a Basilea, han fatg ina visita a Tele Basel ed han discurrì cun ils responsabels.

5.2 Emissiuns crititgadas

Ils recurs inoltrads èn sa drizzads per gronda part cunter emissiuns da televisiun. Mo dus han pertutgà emissiuns da radio, trais tant emissiuns da radio sco er da televi-

siun. 12 recurs èn stads cunter emissiuns en la Svizra tudestga e sis en la Svizra romanda. Objects da recurs èn stadas singulas emissiuns da la Televisiun svizra SF/SF 1 (10), da la Télévision Suisse Romande TSR (3), da la TSR e da Radio Suisse Romande (2), dad SF e da Radio DRS (1), da Radio Argovia (1) e da Rhône FM (1).

Ils recurs han pertutgà per gronda part emissiuns d'infurmazion che han tematisà dumondas politicas actualas e spezialmain las proximas elecziuns e votaziuns. Il pli savens è vegnida crititgada la „Tagesschau“ da la Televisiun svizra, numnadamaain set giadas.

5.3 Recurs approvads

Tar sis proceduras terminadas l'onn 2011 ha l'Instanza constatà ina violaziun da dretg (onn avant: 3). En tuts queste cas è il princip d'objectivitat tenor l'art. 4 al. 2 LRTV stà la raschun decisiva. Approvà ha l'Instanza en spezial recurs cunter las suandardas emissiuns: Televisiun svizra, emissiuns „Tagesschau“ e „10 vor 10“, rapports davart resultats d'enquistas d'opiniuns concernent las proximas votaziuns federalas (guarda er cifra 5.6); Televisiun svizra, emissiun da tard da la „Tagesschau“, contribuziun davart in conflict da pajes en la branscha da construcziun (guarda latiers er cifra 6.4), Tele Züri, emissiun „ZüriNews“, contribuziuns concernent Carl Hirschmann (guarda latiers er cifra 6.3), TSR, emissiun „19:30“, contribuziun pertutgant in'ediziun da las „VgT-Nachrichten“ (guarda er cifra 6.1) e Tele Ostschweiz, emissiun „Focus“, discussiun pertutgant la concessiun per la televisiun regiunala. Il Tribunal federal ha approvà in recurs cunter questa ultima decisiun da l'Instanza ed ha annullà questa decisiun (guarda er cifra 7).

5.4 Dumondas da procedura

Recurs pertutgant l'access pretendan adina puspè da l'Instanza d'agir spert. Quai vala spezialmain avant elecziuns. Ils 2 da settember ha la „Alternative Linke“ fatg recurs, perquai ch'ins l'ha refusà l'access ad emissiuns da Radio Télévision Suisse avant las elecziuns federalas dals 23 d'october. Pervia dals termins bler pli curts da prender posiziun ha l'Instanza prendì gia ils 10 d'october – en ina deliberaziun publica – ina decisiun materiala en chaussa. Er sch'il recurs fiss vegni approvà, na fissi betg stà pus-saivel d'obligar l'emettur da far in'emissiun supplementara cun la partida exclusa. Quai perquai che la decisiun, ch'era avant maun mo a bucca, n'aveva nagina vigur legala e perquai che l'Instanza n'aveva naginas cumpetenzas da prender mesiras.

L'Instanza ha dentant almain pudì render attent la publicitat avant il termin d'elecziun, che l'access refusà al program haja cuntrafatg al dretg.

En il rom d'ina instrucziun da las proceduras da recurs ha l'Instanza schlargià ils dretgs da las persunas ch'en participadas a la procedura. Ellas survegnan en spezial la chaschun da prender posiziun da princip davart mintga scrittura processuala da la cuntrapartida, independentamain da la dumonda, sche quella preschenta novs fatts relevants. Quai vala tant per recurs da pertutgads sco er per recurs populars che han la medema posiziun giuridica sco ils recurs dals recurrents. Tras questa midada da pratica tegna l'Instanza quint da la nova giurisdicziun dal Tribunal federal sco er da la Curt europeica dals dretgs umans pertutgant la dimensiun da l'attenziun giuridica.

5.5 Dumondas da cumpetenza

Emissiuns da televisiun davart ils resultats d'enquistas d'opiniuns en connex cun las elecziuns e las votaziuns federalas han chaschunà numerus recurs tar l'Instanza. Critigà è vegnì repetidamain che l'Institut incaricà da l'emettur n'haja betg eruì e validità en moda scientificamain correcta las datas. Questa dumonda, ch'è vegnida discutada extendidamain er en la publicitat e che ha er chaschunà intervenziuns parlamentaras, n'è betg da gener da radio u televisiun e n'è perquai er betg da giuditgar da l'Instanza.

En sia decisiun dals 21 d'avrigl ha il Tribunal federal prendì posiziun davart la dumonda da princip, tgi che saja cumpetent per la surveglianza sin il champ da l'ulteriura purschida publicistica da la SSR (upp). La dimensiun da l'upp tenor l'art. 25 al. 3 lit. b LRTV è reglada en la concessiun da la SSR e cumpiglia tenor quella la purschida online, infurmaziuns associadas al program, la purschida publicistica per l'exterior ed il material accumpagnant per emissiuns. Per mancanza da cumpetenza n'è l'Instanza betg entrada sin in recurs cunter contribuziuns da texts sin ina pagina d'internet da la Televisiun svizra ed ha dà vinavant quest recurs a l'UFCOM. Quel è sa considerà sco cumpetent en il rom d'ina disposiziun intermediara. Questa opiniu è vegnida confermada dal Tribunal federal en la decisiun menziunada sco confirma al dretg federal. En connex cun la revisiun parziale planisada da la LRTV duai questa cumpetenza vegnir surdada a l'Instanza, e quai per ponderaziuns generalas da la politica da medias.

5.6 Dretg material

Sco ils onns precedents è il princip d'objectivitat tenor l'art. 4 al. 2 LRTV stà en il center dal giudicament material-giuridic da recurs cunter il program da l'onn 2011 (guarda pertutgant las singulas decisiuns las cifras 6 qua sutwart). La dumonda decisi-va è, schebain il public ha pudi furmar libramain sia atgna opiniu davart il tema ch'è vegni tractà en in'emissiun u contribuziun. Fin ussa ha l'Instanza examinà ils recurs correspondents en duas fasas. En in emprim pass ha ella giuditgà, schebain il public ha pudi furmar sia atgna opiniu davart in'emissiun crititgada. Sche quai n'era betg il cas, ha l'Instanza er anc examinà, schebain las obligaziuns schurnalisticas da pre-cauziun èn vegnidas violadas. Questa examinaziun dubla n'è betg pli confirma a la pratica tenor l'avis da l'Instanza. Quai ha er chaschunà malchapientschas tar il public che ha crititgà pliras giadas sulettamain la violaziun d'obligaziuns da precauziun. Sche l'Instanza ha constatà ch'il public n'ha betg pudi furmar sia atgna opiniu, èn prest senza excepcziun er mintgamai vegnidas violadas reglas da precauziun schurnalistica. Cunquai ch'omadus aspects stattan en in fitg stretg connex, n'examinescha ella betg pli separadament quests dus aspects. Per ch'il public possia furmar libra- main sia atgna opiniu, ston stringentamain er vegnir observadas las obligaziuns da precauziun centralas.

Per contribuziuns da radio e televisiun, che han preschentà resultats d'enquistas d'opiniuns curt avant elecziuns u votaziuns, ha l'Instanza definiò obligaziuns da pre-cauziun spezialas per ils emetturs, per ch'il public possia furmar sia atgna opiniu. Latiers tutga ultra d'ina reproducziun correcta dals resultats da l'enquisa er ina preschentaziun transparenta da las cundiziuns generalas da la retschertga. Spezial- main da menziunar èn l'incaricader, l'institut incaricà, las modalitads da l'enquisa (oravant tut il dumber da persunas interrogadas), la quota da sbagli e la durada da la retschertga. En connex cun numerusas contribuziuns d'emissiuns da novitads da la Televisiun svizra davart resultats d'enquistas pertutgant las proximas votaziuns federalas, giuditgadas l'onn 2011, ha l'Instanza constatà en trais cas ina violaziun dal princip d'objectivitat. La raschun è stada quella ch'ils resultats eruids n'èn betg vegnids preschentads correctamain. Uschia n'ha en spezial la Televisiun svizra betg differenzià tranter la cumpart da quels che han ditg cleramain gea resp. na, e da quels ch'en plitost stads per in gea u per in na. Il public ha survegnì l'impressiun engiananta che la cumpart da quels che han votà cleramain gea resp. na, saja signi- fitgantamain pli auta ch'en cumparegliazun cun ils resultats effectivs da l'enquisa.

Sin basa da plirs recurs è l'Instanza er sa fatschentada detagliadama cun la dumonda, cur ch'i cuntrafetschia al dretg, sche l'access a la part redacciunala dal program vegn refusà. En connex cun il boicot sistematic d'ina organisaziun tras la Televisiun svizra durant onns è l'Instanza s'exprimida per l'emprima giada davart ils criteris material-giuridics per giuditgar constellaziuns correspondantas (guarda er cifra 6.2 qua sutvart).

5.7 Proceder suenter violaziuns constatadas

Suenter ina violaziun dal dretg dat l'Instanza als emetturs pertulgads regularmain 30 dis temp da rapportar davart las mesiras prendidas (art. 89 al. 1 LRTV). Questas mesiras duain garantir che la mancanza vegnia eliminada e che la violaziun na sa repetia betg pli. Ultra da mesiras internas che han l'intent che las obligaziuns schurnalisticas vegnian observadas en l'avegnir, cuntegnan quellas er l'indicaziun da las emissiuns che han violà il dretg respectiv en l'archiv electronic da l'emettur – per exemplu cun in link sin la decisiun da l'Instanza. L'Instanza na pretendea dentant betg dals emetturs pertulgads da stizzar las emissiuns crititgadas ord l'archiv electronic. Er na scumonda ella betg da commerzialisar tals cuntegns da radio e televisiun. L'onn 2011 ha l'Instanza taxà las mesiras ch'ils emetturs han prendi suenter las violaziuns constatadas. Senza excepcziun è ella vegnida a la conclusiun che quellas sajan sufficientas. Ella n'ha perquai er già nagins motivs da dumandar il DATEC da pudair exercuir las mesiras pretendidas.

6 Or da la pratica da l'Instanza

En la suandanta survista davart la pratica da l'Instanza vegnan preschentadas en moda cumpilada tschertas decisiuns da recurs da l'onn da gestiun. Ils texts integrals da tut las decisiuns da l'onn 2011 sa chattan en furma anonimisada sin la pagina d'internet da l'Instanza (www.ubi.admin.ch).

6.1 Decisiun b. 623 dals 3 da december 2010 concernent la Télévision Suisse Romande, emissiu „19:30” contribuziun davart las „VgT-Nachrichten”

Ils fatgs: Ils 31 da mars 2010 ha la TSR mussà en l'emissiu da novitads „19:30” ina contribuziun davart l'ultima edizion franzosa da las „VgT-Nachrichten”. Tut las chassadas dal chantun Friburg avevan retschavì questa publicaziun. En il center da questa edizion è stà ina preschentaziun d'ina dispita giuridica, nua ch'il president dal VgT è vegni sentenzià pervia da menziuns offendentes cunter in cusseglier guvernativ friburgais en in'antieriura edizion da la medema publicaziun. Il president dal VgT critigescha en las „VgT-Nachrichten” l'entira procedura e la taxescha sco giustia arbitraria. Cunter questa decisiun dal Tribunal federal ha el recurrì tar la Curt europeica dals dretgs umans. En la contribuziun da la TSR prenda il cusseglier guvernativ friburgais pertutgà posiziun davart la nova publicaziun.

Valitaziun: En ses giudicament è l'Instanza vegnida a la conclusiun ch'il public n'ha ja – sin basa da l'emissiun – betg pudì far in'atgna opiniu davart il tema tractà. Ins ha stuì supponer ch'il president dal VgT haja repetì en la novissima edizion da las „VgT-Nachrichten” primarmain las anteriuras inculpaziuns cunter il cusseglier guvernativ friburgais. Quellas èn vegnididas menziunadas cleramain anc ina giada per documentar detagliadament l'entira procedura che aveva chaschunà la sentenzia dal president dal VgT. Il public n'ha perquai er betg intervegnì che questa publicaziun ha vulì mussar l'arbitrariadad evidenta dals organs giudizials involvids. I n'è alura er betg vegni menziunà ch'il president dal VgT haja fatg recurs tar la Curt europeica dals dretgs umans per las raschuns documentadas en las „VgT-Nachrichten”.

En la contribuziun da la TSR èn vegnididas fatgas renfatschas cunter il president dal VgT. Ins ha survegnì l'impressiun ch'el saja puspè s'exprimì en la nova publicaziun en moda ingiuriusa cunter il cusseglier guvernativ da Friburg. Al president dal VgT n'han ins dà nagina chaschun da preschentar ses puntg da vista, malgrà ch'el era

sa declarà da princip pront da far quai. La correspundenza per email tranter el e la redacziun avant l'emissiun è vegnida resumada en moda incumpletta e tendenziu-
sa en la contribuziun. Pervia da la violazion dal princip d'objectivitat ha l'Instanza
approvà il recurs.

6.2 Decisiun b. 593/607 dals 22 d'octobre 2010 concernent la Televisiun svizra rapports manchentads davart il VgT

Ils fatgs: Il „Verein gegen Tierfabriken Schweiz (VgT)“ ha inoltrà dus recurs a l'Instanza. El ha fatg valair che la Televisiun svizra al censureschia dapi passa diesch onns per raschuns politicas ed ideologicas. Uschia n'haja la Televisiun svizra betg rapportà davart trais decisiuns da la Curt europeica dals dretgs umans, en las qualas la Svizra era vegnida sentenziada. La raschun saja stada ch'in spot da reclama dal VgT, che mussa co che animals da niz vegnan mudregiads, na saja betg vegni emess. La Curt europeica dals dretgs umans ha taxà il scumond d'emetter quest spot da reclama sco betg cumpatibel cun la libertad d'exprimer sia atgna opiniun tenor l'art. 10 CEDU. Perquai è la Svizra vegnida sentenziada pliras giadas.

L'Instanza n'è l'emprim betg entrada sin ils dus recurs dal VgT, perquai ch'ella ha considerà las premissas per recurrer sco betg ademplidas. Ils recurs inoltrads èn per-
cunter vegnids approvads dal Tribunal federal. El ha constatà ch'ins na possia betg excluder ina discriminaziun dal VgT tras la Televisiun svizra ed ha perquai ordinà a l'Instanza d'examinar detagliadament il cuntegn dals recurs inoltrads.

Valitaziun: Ina discriminaziun fiss dada, sche la Televisiun svizra avess exclus il VgT da ses rapports mo per motivs politics-ideologics e senza raschuns objectivas. L'exami-
naziun tras l'Instanza ha mussà che la Televisiun svizra ha emess en l'interval relevant
(1998 fin fanadur 2009) trais contribuziuns tudestgas en connex cun il VgT. En spezial
ha ella er emess en l'ediziun principala da l'emissiun da novitads „Tagesschau“ ina
curta contribuzion davart la decisiun-clav da la Curt europeica dals dretgs umans.

En comparegliazion cun autres organisaziuns per la protecziun dals animals en Svizra
n'è il VgT betg evidentamain vegni dischavantagià en il program da la Televisiun
svizra. Insaquantas paucas organisaziuns per la protecziun dals animals, ch'en er ac-
tivas en Svizra, ha la Televisiun svizra menziunà en quest interval circa tuttina savens
sco il VgT, autres insumma betg. Sulettamain davart la Protecziun svizra dals animals

(PSA) èsi vegnì rapportà, spezialmain pervia da sia laver politica (per exemplar tar iniziativas popularas), bler dapli che davart il VgT. Per il dumber da contribuziuns relativamain pitschen davart il VgT en il program da la Televisiun svizra datti – sper la situaziun da concurrenza tranter las organisaziuns per la protecziun dals animals – anc auters motivs objectivs. Ina giada il temp d'emissiun limità, quai che pretenda ina selecziun considerabla dals temus tractads al radio ed a la televisiun. Plinavant èsi da resguardar che la relevanza da l'activitat da las organisaziuns per ils rapports en las medias e per l'autonomia da program dals emetturs, che cumpiglia er la libertad d'eleger ils temus, sa mida. In'eventuala ordra taciturna da la Televisiun svizra da boicottar il VgT n'ha l'Instanza dal rest betg pudì confermar. Insaquantas menziuns malformuladas d'in anterius schefredactur davart il president dal VgT na pon betg gia vegnir interpretadas en il context sco ordra da caracter discriminant.

Per ils motivs menziunads n'ha la Televisiun svizra betg discriminà il VgT u refusà autramain e senza dretg l'access a la part redacziunala dal program. La decisiun da l'Instanza è vegnida tratga vinavant al Tribunal federal.

6.3 Decisiun b. 616 dals 3 da december 2010 concernent la Tele Züri, emissiun „ZüriNews“ contribuziuns davart Carl Hirschmann

Its fatgs: Ils 5 da november 2009 ha l'emettur da televisiun regional Tele Züri mussà en l'emissiun „ZüriNews“ la contribuziun „Grevas renfatschas“. Il tema era l'arrestaziun da Carl Hirschmann e las renfatschas da dunnas anonimisadas cunter el pervia da mulestas sexualas presumtivas en il local VIP da ses anterius club da partys. En l'emissiun dals 14 da december 2009 ha Tele Züri rapportà en „ZüriNews“ sut il titel „Squitsch“ ina giada dapli davart las renfatschas cunter Carl Hirschmann. Veginida tematisada è la credibilitat da las pretensiuns d'ina dunna giuvna, che ha renfatschà en la contribuziun dals 5 da november 2009 a Hirschmann ch'el haja sfurzà in'amia da la dunna giuvna a sex oral. La redacziun è er sa dumandada, schebain l'infurmenta haja entant revocà sia inculpaziun pervia da smanatschas ord il conturn da Carl Hirschmann.

Valitaziun: La contribuziun dals 5 da november 2009 dat al public ina impressiun faussa che Carl Hirschmann saja vegnì arrestà pervia d'attatgas sexualas sin pliras giuvnas. Plinavant n'èn er menziuns disputaivlas betg da recepir sco talas dal public. Quai pertutga – sper ils motivs concernent l'arrestaziun betg intermediads cor-

rectamain – er las grevas renfatschas da duas giuvnas dunnas cunter il recurrent, renfatschas che na vegnan betg cuntraditgas. Il puntg da vista da Carl Hirschmann na vegn insumma betg exprimi. A la presumziun d'innocenza, che vala en rapports davart proceduras penales pendentes per persunas accusadas, n'ha la redacziun pertutgada da Tele Züri er betg rendi attent. Il cuntrari: Carl Hirschmann vegn presentenzià veritablamain a la fin da l'emissiun. Tranter auter vegn pretendi che na-gins daners al possian gidar ord questa situaziun. Il commentari final saja in grond surpassament da la presumziun d'innocenza.

En la segunda emissiun crititgada en „ZüriNews“ po l'incaricà da medias da Carl Hirschmann bain prender posiziun. Ma el discurra mo en l'agen num. Tele Züri ha tralaschà da menziunar che Carl Hirschmann contestia puspè expressivamain tut las renfatschas d'ina dunna giuvna ch'en puspè vegnididas emessas. Empè da quai surpiglia Tele Züri la rolla da las autoritads d'inquisiziun ed examinescha la credibladad da las renfatschas. Il giudicament che suonda è tendenzius e na renda betg attent a la procedura pendenta. Pertutgant la relevanza da las renfatschas n'ha il public betg pudi far in'atgna opiniun.

Per las raschuns menziunadas han las duas emissiuns violà il princip d'objectivitat.

6.4 Decisiun b. 629 dals 17 da zercladur 2011 concernent la Televisiun svizra, emissiun da tard da la „Tagesschau“ contribuziuns davart il conflict da pajas en la branscha da construcziun

Il fatgs: Ils 20 da november 2010 ha la „Tagesschau“ rapportà en sia emissiun principala ed en quella da tard davart la situaziun da las contractivas da pajas en la branscha principala da construcziun. Quest di han ils sindicats reagì cun gronda nun-chapientscha sin l'offerta da la Societad svizra dals impressaris-constructurs ch'era ord lur vista dal tuttafatg nunsuffizienta. Il conflict da lavur era s'intensivà ils dis avant, cunquai ch'ils patruns n'avevan betg auzà lur purschida ed er desditg la runda da contractivas planisada. La Societad svizra dals impressaris-constructurs ha recurrit cunter la contribuziun davart quest conflict da pajas. Questa contribuziun ha durà bundant ina minuta en l'emissiun da tard da la „Tagesschau“.

Valitaziun: En la contribuziun crititgada èn sulettamain vegnididas mussadas la posiziun e l'argumentaziun dals sindicats. Lur manader da questas contractivas ha già la chaschun da s'exprimer davart il conflict da pajas e concernent l'offerta dals impres-

saris (che „saja davairas miserabla“). La posiziun dals sindicats e lur nunchapientscha visavi l'offerta dals impressaris è stada chapaivla per il public. Che l'accent principal da la contribuziun è vegnì mess – en vista als eveniments actuals dal di – sin la situaziun dals sindicats, n'è betg da crititgar. Ch'ins ha dentant ignorà totalmain l'optica dals impressaris ha restrenschì grondamain la furmaziun d'ina atgna opiniu tar il public davart quest conflict da pajas. I n'è betg da presumar ch'ils aspectaturs disponivan da las enconuschienschas correspundentas pertutgant las contractivas da paja en la branscha principala da construcziun. Sch'ins avess menziunà ils arguments ils pli impurtants dals impressaris e la nauscha situaziun da rendita, avess il public survegnì in auter maletg bler pli differenzià davart il conflict da pajas.

Il fatg ch'in represchentant da la Societad svizra dals impressaris-constructurs è vegnì a pled en ina contribuziun pli lunga da l'emissiun principala da la „Tagesschau“ n'ha betg pudi vegnir resguardà tar il giudicament da l'emissiun da tard. L'object dal recurs è sulettamain stà la contribuziun da tard e betg il total da las emissiuns redacziunalas da la Televisiun svizra davart il conflict da pajas en la branscha da construcziun. Er il temp d'emissiun pli curt en l'ediziun da tard na giustifitgescha betg da gnanc menziunar almain summaricamain la posiziun dals impressaris attatgads. Il princip d'objectivitat è vegnì violà per ils motivs menziunads.

7 Tribunal federal

La Segunda partiziu da dretg public dal Tribunal federal ha già da tractar l'onn da gestiun plirs recurs en chaussa da dretg public cunter decisiuns da l'Instanza. Sper las decisiuns cumpiladas qua sutvar ha il Tribunal federal refusà in recurs en connex cun ina dumonda da recusaziun cunter il president da l'Instanza e n'è er betg entrà sin ina dumonda da reveder tal. Dus recurs cunter decisiuns da l'Instanza, che pertutgavan contribuziuns da televisiun d'emetturs betg concessiunads (Presse TV, Tele Ostschweiz), ha il Tribunal federal percunter approvà. Las motivaziuns correspondentes n'eran anc betg avant maun a la fin da l'onn da gestiun.

7.1 Sentenzia 2C_664/2010 dals 6 d'avrigl 2011

Tras la decisiun dals 19 da favrer 2010 ha l'Instanza refusà in recurs cunter il rapport dal magazin da novitads „10 vor 10“ da la Televisiun svizra pertutgant ils privels da las pirlas anticonceptivas da la quarta generaziun. Tar questa contribuziun èsi i per l'istorgia d'ina giuvna che ha già in'embolia dal lom ed è veginida fitg impedita suenter avair prendi ina tala pirla. Il Tribunal federal taxescha la decisiun da l'Instanza sco confirma al dretg federal. La posiziun da la distributura da quest preparat seja veginida preschentada suffizientamain en l'emissiun crititgada. L'autonomia da program permettia dal rest als emetturs „da tractar en la rolla d'advocata in tema a maun d'in cas singul, sche la fairness schurnalistica vegnia observada tut en tut“. Er la renfatscha fatga en il recurs, che la „scandalisaziun nunnecessaria“ haja sfalsifitgà la furmaziun d'ina atgna opiniun, taxescha il Tribunal federal sco betg motivada: „(...) malgrà la colliaziun emozionala da l'aspectatur tras maletg e tun hai dà ina cuntrapaisa che ha permess d'ordinar ils divers puntgs da vista (schurnalista, firma producenta, autoritat statala da surveglianza)“.

7.2 Sentenzia 2C_710/2010 dals 18 da november 2011

Cun la decisiun da tagl dal president aveva l'Instanza approvà ils 19 da favrer 2010 in recurs cunter la contribuziun „PLD e lobi da farma“ en l'emissiun „10 vor 10“. En il cuntrarecurs ha la SSR fatg valair che las reglas da decisiun dal Reglement da fatschenta da l'Instanza na satisfetschian betg a las pretensiuns envers il derschader legal (art. 30 Cst.) ed envers ina procedura faira (art. 29 Cst.). La cumposiziun dal gremi giuditgant dependia da casualitads e la pussaivladad da la vusch da tagl dal president stettia en cuntradicziun cun il princip da la medema vigur da votar. Il Tribu-

nal federal ha dentant constatà che „la pratica applitgada da l'Instanza na violeschia ni l'art. 12 da ses Reglament da fatschenta ni ils art. 30 e 29 Cst.“, e quai independen-tamain dal fatg, „schebain l'Instanza vegnia qualifitgada sco clera instanza giuridica u sco cumissiun d'autoritat quasi giudiziala“. El motivescha quai sco suonda: „La cumposizion normala da l'Instanza cumpiglia en il cas singul nov commembers. Il quorum d'almain sis commembers garentescha che l'Instanza po decider er en cas d'absenzas motivadas (dumonda da recusaziun, malsogna andetga u pli lunga etc.). Quai è necessari, perquai che l'Instanza na dispona betg da suppleants, uschia ch'el-la po er decider en cas, nua che betg tuts nov commembers n'èn preschents. (...) La vusch da tagl dal president gida ad impedir situaziuns da patt che pudessan – en cas d'ina cifra pèra da commembers – mo vegnir evitadas cun excluder in ulterior com-member elegì, quai che muntass ina greva intervenziun en la pretensiun da l'art. 30 Cst. e che fiss – senza trair la sort – collià cun in privel da manipulaziun pli grond che tras la decisiun da tagl dal parsura en las situaziuns da patt ch'i dat (propri) mo excepziunalmain“.

Cuntrari a la maioritad da l'Instanza è il Tribunal federal stà da l'avis che la contribu-zion da televisiun ch'el ha già da giuditgar seja cumpatibla cun il princip d'objectivitat ed ha perquai acceptà il recurs cun 3:2 vuschs. Per il Tribunal federal è stà decisiv ch'ils parlamentaris da la PLD pleidentads en l'emissiun ed anc auters exponents da la partida han già la chaschun da preschentar lur opinin davart las praticas crititgadas. Per il public seja uschia stà cler che la tesa d'ina stretga colliaziun tranter la PLD e la lobi da farma – sco quai che la Televisiun svizra aveva pretendì – seja disputaivla. Sco gia tar la decisiun dals 7 d'avrigl 2011 (guarda er cifra 7.1) renda attent il Tribunal federal ch'il princip d'objectivitat seja d'applitgar „en vista a la libertad da diffusiu-n (art. 10 CEDU)“ e menziunescha en quest connex diversas sentenzias da la Curt eu-ropeica dals dretgs umans.

8 Fatgs internaziunals

L'Instanza è dapi l'onn 1996 commembra da l'European Platform of Regulatory Authorities (EPRA), in'organisaziun independenta d'autoritads europeicas da radio e televisiun. Da quella fan 53 instanzas part. En il center stat il barat d'opiniuns e d'infirmaziuns.

L'Instanza ha analisà il niz da questa commembranza en vista al fatg che blers temas (sco per exempl il concessiunament, la reclama) na la pertutgan betg. La valur generala da la collavuraziun, spezialmain il barat d'infirmaziuns, na vegn betg messa en dumonda. Da sa participar a sesidas, nua ch'i na vegnan tractads nagins temas relevantes per l'Instanza, considereschan ils commembers sco betg senz'auter neces-sari. Tut tenor po l'UFCOM, che fa er part da l'EPRA, represchentar sulet la Svizra. Ins ha gia discurrì cun l'UFCOM en chaussa per pudair coordinar meglier las activitads.

Las sesidas da l'onn 2011 han giì lieu ad Ohrid en Macedonia (25 fin 27 da matg) ed a Brüssel (6 fin 8 d'october). Sper il svilup dal dretg da diffusiu en l'Europa han ins er discussiunà tranter auter l'independenza da las autoritads da diffusiun e la protecziun da la giuventetgna en connex cun las novas medias. L'Instanza è vegnida represchentada da sia vicepresidenta Regula Bähler.

9 <http://www.ubi.admin.ch>

La pagina d'internet principala per la laver publica da l'Instanza è vegnida frestgenu-tada l'onn 2011. La finamira primara è stada quella da realisar ina pagina d'internet che serva anc meglier al public. L'Instanza è stada liada – sco tut las autras autoritads federalas e l'administraziun federala – vi da las prescripziuns dal CD-Bund (Corporative Design Bund) per ina cumparsa unitara. Las novaziuns per propi sin la pagina d'internet renovada èn da chattar sin la pagina d'entrada. Ultra dals pleds introductivs dal parsura pon ins ir spert sin las paginas che vegnan utilisadas il pli savens (communicaziuns actualas, procedura, deliberaziuns publicas, banca da datas da decisiuns, contacts). Las paginas gia existentas èn vegnidas repassadas redaciunalmain.

Agjunta I: Cumposiziun da l'Instanza da recurs e secretariat


Commembers/bras

	en uffizi dapi	elegì/ida fin
Roger Blum (prof. em. per scienzas da medias, Cologna)	01-01-2008 president	31-12-2011
Regula Bähler (advocata, ZH)	01-01-2001 vicepresidenta	31-12-2011
Paolo Caratti (advocat e notar, TI)	01-01-2004	31-12-2011
Carine Egger Scholl (presidenta da l'autoritat d'intermediaziun Bern-Mittelland, BE)	01-01-2004	31-12-2011
Heiner Käppeli (vicedirectur MAZ, LU)	01-05-2002	31-12-2011
Denis Masmejan (schurnalist, GE)	01-01-1997	31-12-2011
Alice Reichmuth Pfammatter (derschadra chantunala, SZ)	01-01-2001	31-12-2011
Claudia Schoch (redactura, advocata, ZH)	01-02-2005	31-12-2011
Mariangela Wallimann-Bornatico (BE)	01-07-2008	31-12-2011

Secretariat da l'Instanza

Secretariat giuridic	en uffizi dapi	per
Pierre Rieder (direcziun)	01-10-1997	90 %
Réjane Ducrest	15-08-2008	40 %
Chanzlia	en uffizi dapi	per
Nadia Mencaccini	01-05-2006	50 %

Agjunta II: Indicaziuns statisticas per l'interval da 1984-2011



	1984	1985	1986	1987	1988	1989	1990	1991	1992	1993	1994	1995	1996	1997
--	------	------	------	------	------	------	------	------	------	------	------	------	------	------

Recurs/cas

entrads	39	23	21	18	24	32	40	50	18	16	13	28	21	25
liquidads	31	25	23	16	17	36	35	42	29	22	10	23	29	24
pendents	8	6	4	6	13	9	14	21	10	4	8	13	5	6

Legitimazjun

recurs populars / interess public	11	8	6	5	9	11	31	33	10	7	9	16	17	20
recurs da singuls	28	15	15	13	15	21	9	17	8	9	4	12	4	5
departament														

Recurs cunter

Radio	13	8	5	6	4	10	7	15	6	4	5	4	3	2
Televišiun	26	15	16	12	20	22	33	35	12	12	8	24	18	23

SSR / RDRS	11	6	3	3	3	7	6	13	5	2	4	3	2	2
SSR / TVDRS / SF	13	9	12	7	14	16	29	29	11	8	5	20	17	16
SSR / RSR	2	2	0	0	0	1	1	0	0	0	0	0	0	0
SSR / TSR	9	5	5	4	4	5	4	3	1	3	1	3	0	4
SSR / RSI (radio)	0	0	0	0	0	1	0	0	0	0	1	0	1	0
SSR / RSI (TV)	2	1	0	1	0	0	0	0	0	1	1	1	0	1
SSR / Radio Rumantsch	0	0	0	0	0	0	0	0	0	0	0	0	0	0
SSR / diversas emissiuns	1	0	1	1	2	0	0	2	0	2	0	0	0	0
Radios locals	1	0	1	2	1	1	0	2	1	0	0	1	0	0
Televišiuns localas	0	0	0	0	0	0	0	0	0	0	0	0	1	0
Ulteriori realisaders privats da televišiun	0	0	0	0	0	0	0	0	0	0	1	0	0	1
Emess da l'exterior	0	0	0	0	0	0	0	1	0	0	0	0	0	1
Teletext	0	0	0	0	0	0	0	0	0	0	0	0	0	0

Liquidà cun

pacificaziun	0	0	0	0	0	6	2	1	2	1	0	2	1	0
brev da mediatur	3	2	1	3	2	6								
decisiun da na entrar	3	6	5	1	0	10	7	8	1	9	3	6	14	7
decisiun materiala	23	16	13	10	14	12	24	32	23	12	7	14	14	17
retratg	2	1	4	2	1	2	2	1	3	0	0	1	0	0

Decisiuns materialas

nagina violaziun da la concessiun	23	14	13	10	11	10	24	29	21	11	8	10	13	13
violaziun da la concessiun	0	2	0	0	3	2	0	3	2	1	2	4	1	4

	1998	1999	2000	2001	2002	2003	2004	2005	2006	2007	2008	2009	2010	2011
--	------	------	------	------	------	------	------	------	------	------	------	------	------	------

Recurs/cas

entrads	18	25	25	22	18	14	25	20	20	30	25	16	14	18
liquidads	16	28	26	20	18	17	20	21	22	19	21	25	13	23
pendents	8	5	4	6	6	3	8	7	7	17	21	11	13	9

Legitimazun

recurs populars / interess public	14	20	25	16	15	12	20	13	15	19	17	7	9	12
recurs da singuls	4	5	0	6	3	2	5	7	5	10	7	9	5	6
departament										1	1	0	0	0

Recurs cunter

Radio	2	4	2	3	7	2	1	2	3	5	6	2	2	2
Televiuniun	16	21	23	19	11	12	24	18	17	25	19	14	12	16

SSR / RDRS	2	2	2	1	4	2	0	2	3	3	5	1	2	1
SSR / TVDRS / SF	11	13	16	12	5	7	19	11	7	16	15	11	6	10
SSR / RSR	0	0	0	0	1	0	1	0	0	1	1	0	0	0
SSR / TSR	4	2	1	1	4	2	1	1	0	6	1	2	3	3
SSR / RSI (radio)	0	1	0	1	1	0	0	0	0	0	0	0	0	0
SSR / RSI (TV)	0	1	1	3	0	1	3	5	2	2	1	1	0	0
SSR / Radio Rumantsch	0	0	0	0	1	0	0	0	0	0	0	0	0	0
SSR / diversas emissiuns	0	0	0	0	0	0	0	0	2	0	0	0	0	2
Radios locals	0	1	0	1	0	0	0	0	0	0	1	0	1	2
Televiuniuns localas	1	0	0	0	0	0	0	0	2	1	1	0	1	0
Ulteriorius realisaders privats da televiuniun	0	3	5	3	2	2	1	1	3	0	1	0	1	0
Emess da l'exterior	0	0	2	0	0	0	0	0	0	0	0	0	0	0
Teletext	0	2	0	0	0	0	0	0	1					

Liquidà cun

pacificaziun	0	0	0	0	0	0	0	0	0					
brev da mediatur														
decisiun da na entrar	2	4	4	5	1	3	3	3	8	4	6	5	2	3
decisiun materiala	14	22	22	15	17	12	16	18	14	14	15	20	11	19
retratg	0	2		0	0	2	1	0	0	1	0	0	0	1

Decisiuns materialas

nagina violaziun da la concessiun	10	14	19	14	10	11	12	11	10	9	11	16	8	13
violaziun da la concessiun	4	8	3	1	7	1	4	7	4	5	4	4	3	6

**Instanza da recurs independenta
da radio e televisiun**

Chascha postala 8547
3001 Berna
Tel. ++41 (0)31 322 55 38
Fax ++41 (0)31 322 55 58
www.ubi.admin.ch
info@ubi.admin.ch